

քից հինգը մարում են մոմերը, որոնք լիմար են համարւում:

Ձատիկ: Մի առանձին բան չի կատարւում, միայն մի շաբաթ շրջում են միմեանց տները և ներկած հաւկիթներով շնորհաւորում Ձատիկը, իսկ հետևեալ օրը՝ մեռելացին բոլորը գնում են գերեզմանատուն իրենց ննջեցեալների գերեզմաններն օրհնել տալու: Այգ օրն աղքատներին գաթայ կամ ձու են բաժանում:

Համբարձում: Ջահիլների ուրախութեան տունն է այդ, որ տօնում են երկու օր: Երեքշաբթի գաթայ են թրխում, ձու ներկում, սեր պատրաստում և Չորեքշաբթի առաւօտեան ջահէլ հարսներն ու աղջիկներն արշալոյսին խմբեր կազմած միասին գնում են Ծաղկախաչը. դա գտնւում է Նամակերտի և Ղառղունի մէջտեղը. այդտեղ միմեանց շնորհաւորում են Համբարձումը և միասին զբօսնում, ուտում են տարածները, և մինչև կէսօր ուրախանում են, երգում, պարում և ապա դաշտից գոյնզգոյն ծաղիկներ քաղում, փնջեր կազմում և խմբովին վերադառնում են գիւղ: Ծեր կանայք նրանց ընդառաջ են գալիս ու ճանապարհի վրայ շաբթով նստում, և երբ հարսներն ու աղջիկները մօտենում են՝ ծաղկեփնջերը կանանց են տալիս և շնորհաւորում Համբարձումը, նրանք էլ օրհնում են:

— «Աղջկերք, դուք էլ էս ծաղիկների նման բացւէք, ծլէք, ծաղկէք, կանաչէք»:

Այնուհետև վերադառնում են գիւղ: Երեկոյեան հաւաքւում են մի տուն և ծաղկեփնջերը խաչաձև դնում մի մաղի մէջ, իսկ մի կճուճի մէջ էլ մի ափ աւազ են լցնում և շուրջը մետաքսէ թաշկինակով զարդարում. ապա հաւաքւում են աղջիկներից զանազան մանրիկ իրեղէններ (բանալի, մատանի, կոճակ, ուլունք, օղ) և գցում կճուճի մէջ: Հետևեալ առաւօտ, Հինգշաբթի, աղջիկները նորից հաւաքւում են կճուճի շուրջը. մի փոքրիկ աղջկայ գլխին ձգում են մի քող, հարս դարձնում, նստեցնում իրենց շրջանի մէջ և վիճակի կճուճը դնում նրա գիրկը. նա ամեն մի անգամ